

（德）
（行）
（武）
（元）

興化府莆田縣志卷二十六

人物志

隱逸傳

宋林緒藻六世孫五代末杜門避世常慕陶靖節嚴
子陵之爲人窮索古典脫屣於功名之途大中祥
符七年詔舉草澤州郡以緒應詔特授將仕郎本
軍教授不出

徐復字希顏寅後幼遊京師舉進士不中退而學易
通流衍卦氣法自筮知無厭遂淡進取遊學淮浙

間數年益通陰陽天文地理遁甲占射諸家之說
他日聽其鄉人林鴻範說詩且言詩之所以用於
樂者忽若有得因以聲氣求之遂悟大樂於七音
十二律清濁次序及鍾磬侈弇匏竹高下制度皆
洞達方仁宗留意於樂詔天下求知樂者大臣薦
胡瑗瑗作鐘磬大變古法復笑曰聖人寓器以聲
今不先求其聲而更其器其可用乎後瑗制作皆
不效范仲淹過潤州見復問曰今以衍卦占之四
有無變異乎復尅西方當用兵推其日月後無少

差慶歷初與布衣郭京俱召見帝問天時人事復
對曰以京房易卦推之今年所配年月日期當小
過也剛失位而不中其在強君德乎帝又問明年
主何卦復曰乾卦用事說至九五盡而止帝又問
前年京師黑風何所應復曰其兆在內豫王喪其
應也明日命爲大理評事固以疾辭乃賜號冲晦
處士復性高潔處世未嘗自異後居杭州萬松嶺
每與林和靖逋往來杭人稱二處士太守蒲宗孟
題其舊隱云冲晦先生不肯官布衣謁帝布衣還

最嫌姓字勝人口惟恐文章落世間大隱不妨居
市井高吟何處問家山平生寄意江湖上雲自無
心水自閑後十年卒子晞字仲齊初仁宗賜復爲
大理評事固辭不就因言臣子晞方舉進士上卽
命爲秘書省校書郎歷長溪海門簿將樂尉威寧
令以母老請爲武康尉未幾拜太子洗馬年五十
餘致仕居杭之葛松嶺閉戶讀書再召守國子博
士陞淮南運使元豐三年卒年七十五

方秉白字直甫隱居教授林光朝方薰劉夙劉湖諸

名士皆其友也孝宗朝憲臣以孝廉薦不起郡守
趙彥勵嘗辟修莆陽志有草堂文集同時翁元字
柔中號荔臺隱居漆林教授後學亦嘗與修莆陽
志

元林璧卿號樵谷靈玄孫明易推星配象演義名重
一時元世祖欲授以美官璧卿曰吾家世金紫一
門四忠義父光世被遇宋朝涓埃莫報何用美官
爲乃力抗辭竟授妙應道濟真人歸隱於麥斜巖
著書自樂煉真修化今樵谷山靈跡尙存學者稱

爲節隱先生

明柯宗仁字自爲潛從子弱冠遊學宮有聲後厭棄
科舉學闢柯山巔雲洞讀書其中聚朋考古凡五
禮悉遵朱元晦書遇三族喪無問遠近必赴吊暮
年患痿不出戶三族有訃卽於臥榻前設位望哭
教諸子惟嚴敬兩字庭闈肅穆里人指所隱洞曰
聖洞所著有愚公素書藁齋紀懷

張元紳少業儒與吳繹思諸人結社放情世外嘗預
修八閩通志又與方伯周瑛編修黃仲昭其修郡

志時元紳已龐眉矣猶日坐籃輿原本山川搜窮
鄉節孝事以傳同邑洪永紹亦預是役方伯編脩
並重之

吳稔字時畊叔告後性穎悟嘗賦廬山瀑有詩有入
雲聲作雨映地色涵秋之句嘗試鄉閭不利遂不
復應舉後當路兩薦爲訓導以母老辭晚築草庵
自居蒔菊千餘本遇花時招致名流窮日賞玩爲
樂因以菊泉自號

陳昂字雲仲爲諸生時倭寇郡城領妻子奔豫立早織

草屨自給繼之以卜復由楚入蜀皆僦於僧登峨
眉遍歷三峽劍門之勝後寓江陵松滋不久巴陵
諸處俱以詩紀勝至金陵自榜於扉為人僦作詩
文福唐林古度寓金陵一日過其門見所榜片紙
色有異入其室一扉之內席床在竈敗紙退筆錯
處其中檢其詩誦之每誦一篇輒反面向壁流涕
嗚咽居數年竟窮以死于書五言近體一帙自爲
序

林承霖字雨可幼時爲諸生卽以古人自期甲申京

城失守承霖謝諸生入麥斜巖隱居潛心理學家
貧妻子藜藿不飽絕不爲意山人皆呼曰林先生
與同郡謝天駒同彙次莆陽四編行世天駒字
山了攜家入山置書數千卷吟咏編摩於名利視
之漠如也

黃世康字元幹少倜儻不羈傲遊燕薊製孟姜女墓
碑文爲時所稱相國沈灌宗伯李維禎皆客之得
千金緣手散之立盡旣而南遊羅浮作南征賦潮
青曲數十首詞筆藻贍得六朝聲偶之遺歸卒於

西湖大願庵自爲銘沈灌葬之庵側相國張瑞圖
代石誌之曰餘韻處從叔擔字任者善詩文有別
趣時放筆爲草篆及水墨花卉皆具興致後遊三
晉亦卒雲中

鄭郊字牧仲博學能文幼嗜經史長以著述自任家
雖困乏意豁如也補郡弟子員爲督學郭之奇李
長倩所賞識拔置第一嘗謁銅山黃道周稱之曰
鄭牧仲一日千里未易材也雲間夏允彝徐孚遠
皆與定交已而遜跡壺山之南泉遂號南泉居士

未嘗一至城市著書甚多朝易十七卷廬陵知縣
于藻爲之刊行尙有史統百四十五卷及南華十
轉水書折衡偶筆寓騷孝經心筵及禪詩文若干
卷藏于家弟郊邑諸生好學博識與郊齊名督學
李長倩首拔食餼安貧樂道隱遁終身所著有皆
山集及易測諸史和陶廣騷春秋表微諸書明人
郭鳳階字友日衛庠生性高潔工詩著有郭子詩
草

劉堯章字陶九讀書百原山中因以爲號少便超超

異行輩爲文沉思入微幾廢寢食未幾聞亂遂挈
家入寒山儼居何巖之麓專意聖學靜坐三年已
而入百原刻厲堅苦理數象緯靡不推究而返之
躬行常曰涵養工夫至無應事接物上簡律一身
不敢自恣意念間稍有愆違輒正色危坐終日會
山中寇亂欲屠兩砦堯章挺身出見皆賴以全衆
德之歸田以謝堅却之甲寅耿逆據閩中耆舊多
被迫脅以束帛聘堯章堅辭不就及鄭氏駐溫陵
修書幣請見堯章力拒之不一往居家孝友與兄

共爨無間言時兄有子五人堯章子二人及析者
以所遺產分爲七五與兄而自取二焉曰吾不忍
令吾兒獨豐也人咸義之性和易近人及義之所
在毅然爲之嘗讀春秋傳註頗疑其鑿後得湛甘
泉正傳曰此可以知聖人之心矣乃下穀城與舊
友商訂成書求就而疾作將革命取陳白沙示門
人六絕吟咏者再點額而逝世之論堯章者以其
高隱却聘似陳聘君然堯章當鼎革之際晦迹寒
山五十餘年不露聲色則爲聘君易爲堯章難也

興化府莆田縣志

卷三十六

七

興化府莆田縣志卷二十七

人物志

鄉行傳

唐吳興屯田員外祭從弟時號長官神龍中以家貴
築延壽陂溉田萬餘頃復陞海爲田築長隄障海
水開溝大小六十餘條以導其流爲泄六十餘所
以殺其勢時有蛟爲孽隄數潰興毅然欲除其害
遂攜刃入水斬蛟卒與蛟俱歿鄉人建祠祀之宋
紹興十九年郡守陸渙奏封義勇侯至今莆田稱

水利北洋曰吳長官南洋曰李長者云

宋林從世初爲福州長樂人性好施治平間至莆見同邑錢氏女築陂將軍巖前弗就乃相溪下流於上杭溫泉水口築之捐貲十萬緡以給其役陂垂成不能勝潮勢之衝激旋潰迨候官李宏至始克成功然實由錢氏及從世開先也故邑人立祠陂上與錢氏李宏俱春秋祀焉

李宏唐宗室裔候官人世雄於財宏性好施人稱爲長者初永春仙遊二縣水合趨于莆人海言水利